

Еліміз тәуелсіздік алғаннан бастап шет елдердегі қандас бауырларымыз да Елбасының салиқалы саясатының арқасында атажұртқа оралып, білімін ұштауға мүмкіндік алып отыр. Төрткүл дүниеге тарыдай шашылған қазақтың ата жұртты аңсап оралуы, қатарымызды молайтып, қабырғамызды толтырғандығы – еңсәлі егемендігіміздің жеңісі мен жемісі.

Қандастарымыз тілі бөлек, түрі бөлек ұлттардың ортасында, басқа мемлекеттерде өмір сүрсе де өз ана тілін, салт-дәстүрін, әдет-ғұрпын сақтауға шама-шарқының келгенінше күресіп, өмір кешкені баршаға аян. Кейбір бауырларымыз өзі өмір сүрген мемлекеттерден озық білім алып, Қазақстанға оралғаннан кейін сол білімін кәдеге жаратып отыруы да еліміз үшін жақсылық емес пе?!

Шетелдегі бауырларымыз бүгінде туған жерге көптеп оралып-ақ жатыр. Еліміз егемендігін алғалы бері қолға алынған ұшан-теңіз жұмыстардың ішіндегі бірегейі де өзге мемлекеттерде өмір сүріп жатқан бауырларымызды тарихи Отанына оралту және сол қандастарымыздың жүйелі білім алып, ортамызға үйлесуі болды десек, артық айтқандық болмас.

# ҚАНДАСТАРҒА ҚАМҚОРЛЫҚ КӨП



Қандастарымызға құшағын көң ашып, олардың білімді болуына бар қолайлы жағдайды жасаған біздің М.Әуезов атындағы Оңтүстік Қазақстан мемлекеттік университетінің құрамындағы Жоғары оқу орнына дейінгі дайындық орталығы да көп жылдан бері қарай тынымсыз жұмыс жасап келеді. Жыл сайын Қытай, Өзбекстан, Моңғолия, Тәжікстан, Түркіменстан т.б. сияқты елдерден келген тыңдаушылар бір жыл бойы білім алып, мемлекеттің тағайындаған шәкіртақысымен жоғары білім алуға дайындалады.

Әр жыл сайын келген тыңдаушылардың арасында ақын, әнші, биші, күйші секілді өнерпаз жастар да жетерлік. Бір жыл бойғы дайындықтан кейін олардың дені еліміздің әр облыстарындағы университеттерге оқуға қабылданып жатыр. Осы дайындық орталығынан түлеп ұшқан тыңдаушыларымыздың арасындағы ақында-рымыздың жыр жинақтары да жарық көріп, жұрттың ықыласына бөленіп отыр. Мәселен, қазіргі кезде Қожа Ахмет Яссауи атындағы Халықаралық қазақ-түрік университетінің 3-курс студенті Арқалық Әмалиятұлы

мен Қайсар Бауыржанұлын айтуға болады.

Дайындық орталығын бітіріп, жоғары оқу орнынан білім алған көптеген бауырларымыздың бұл күнде әртүрлі салада қызмет істеп жүргендері де көңіл қуантар дүние.

Тыңдаушыларға білім алу үшін қажетті жағдайлар толығымен қамтамасыз етілген. Кітапханалар, оқу залдары оларға тегін қызмет көрсетеді. Ғылыми ізденіс үйірмелері, шығармашылық студиялар, спорттық үйірмелер тыңдаушылардың уақыттарын бос өткізбеуі үшін, білімін жетілдіріп, ортаға тез

бейімделуі үшін зор ықпал етіп келеді. Жатақхана да оқу ғимараттарына жақын жерде орналасқан.

Осындай қолайлы жағдайлардың арқасында қандастарымыз өз армандарына жетуге талпыныс жасап келеді. Елге оралған қандастарымызды алға жетелеу, дұрыс бағыт-бағдар беру – біздің басты борышымыз.

**Ә.САХОВА,**  
**Ж.СЫЗДЫҚ,**  
**А.СЕЙТМЕТОВА,**  
М.Әуезов атындағы  
ОҚМУ-дың ЖОО-ға дейінгі  
дайындық орталығының  
аға оқытушылары.